

Presentacion di buki di poesia “Manchi” scirbi pa Helena Engelbrecht-Fonara na Cas di Aruba



DEN HAAG – Na Cas di Aruba e tuma lugar den presencia di Minister Plenipotenciario sr. Edwin Abath presentacion di e buki di poesia “Manchi”, scirbi pa Helena Engelbrecht-Fonara.

Tambe presente na e ocasion aki tabata Minister Plenipotenciario di Antia sr. Marcel van der Plank, demas invitadonan entre nan sr. Walter Palm y sra. Giselle Ecury.

Frank de Rijk, representante di cas editorial “In de Knipscheer”, a hiba palabra unda ela gradici Minister Plenipotenciario sr. Edwin Abath pa e hospitalidad brinda pa tene e presentacion na Cas di

Aruba. Ela menciona cu “In de Knipscheer” tin un laso hopi estrecho cu autornan di Surnam y islanan Caribense. Tambe e tabata tin elogio pa Helena Engelbrecht-Fonara pa su poesianan cu tin hopi emocion y cu e poesianan por ta un consuelo pa otro cu tambe a perde un ser keri.

Helena Engelbrecht-Fonara cu hopi emocion a conta e historia tras di e poesianan na honor y recuerdo di su fayecido esposo Armand “Manchi” Engelbrecht. Tur e poesianan ta sentimentonan cu ta biba cerca dje, desde e fayecimento di e esposo, asina Helena a bisa. ‘For di tristeza, for di perdida, anochi ora cu mi no por drumi of ora cu mi wordi

confronta cu algo cu ta haci corda mi casa’, segun Helena. ‘Nunca mi a scirbi poesia, pero despues di morto di mi casa asina hopi palabra y pensamiento cu na un manera of otro mi mester a haci algo cu nan.

Helena a conta cu ela aserca “In de Knipscheer” cu 185 poesia y despues di hopi luna warda ela haya contesta cu 42 poesia a keda escho pa bin den e buki. ‘Di con 42 poesia, mientras cu e buki di poesia ta un homenage na Manchi Engelbrecht’, asina Helena a bisa. Pero e mester constata cu e algo unico cu un cas editorial ta acepta 42 poesia di un poeta desconoci.

Tambe ela bisa cu e idea pa e potret ariba e buki ta inspira pa e custumber di Manchi Engelbrecht pa tur atardi despues di trabao, bishita Zeerovers na Savaneta y hunga domino cu su amigonan. Tres di su amigonan sinta na e mesa di domino, unda bo ta mira nan man y un stul bashi cu e sombre di Manchi.

Helena a termina na gradici tur hende cu a haci e presentacion posibel y a haci entrega di e prome ehemplar di “Manchi” na Minister Plenipotenciario sr. Edwin Abath. Sr. Abath a referi den su palabranan na Manchi Engelbrecht como un

personan hopi social.

E tabata esposo, tata, politico y mentor. Sr. Abath tabata tin palabra di aprecio pa Helena cu ta medio di su poesianan ta tene e recuerdo di Armand “Manchi” Engelbrecht bibo y a bisa tambe cu spera cu e poesia por brinda e consuelo na otronan cu a haya falta di nan personanan stima.

Finalmente sr. Abath tabata tin palabra di elogio pa In de Knipscheer pa brinda nos autornan e oportunidad pa publica nan obranan literario. Na final tabata tin oportunidad pa esnan presente cumpra un ehemplar di e buki cu firma di e escritor.